

**Date – 26/07/2025**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. National Highway-06 Rengte Tlangsang, Kawnpui leh Khamrang kawngdunga tangkhang lirthei khalhtute chu naktuk atangin sorkar ruahmanna in eitur leh tui in tur pek an ni dawn.
2. Eptu Party ten Mizorama inkalpawhna kawng chhia te sorkarin mawh laa siamtha vat tura an phut thu an sawi.
3. Prime Minister Narendra Modia chuan vawiin khan Maldives Independence Day vawi 60-naah khuallian niin a hmanpui.
4. Prime Minister Narendra Modi chuan Pathianni chawhma dar 11 hian 'Mann Ki Baat' programme a hmang dawn.



**FOOD SUPPLY**

National Highway-06 Rengte Tlangsang, Kawnpui leh Khamrang kawngdunga tangkhang lirthei khalhtute chu naktuk atangin sorkar ruahmanna in eitur leh tui in tur pek an ni dawn.

Food Civil Supplies & Consumer Affairs Minister, Pu B. Lalchhanzova kaihhruiin Bialtu MLA leh Deputy Speaker Pu Lalfamkima leh Kolasib District Official te thukhawmin lirthei tangkhangte chungchang hi tukin khan Kolasib ah an ngaihtuah a, Ei leh in tur ngaihtuaha, a mawmawhtute hnena sem hna hi Kolasib atanga hmar lam chu KDTOA & MTDA leh an phungbawmte kutah dah felin, chhim lam chu Kolasib Sub-Hqrs. YMA kutah a dah a ni a. A tum khat nan lirthei khalhtute hi buhfai, dal, tel, purunsen leh tui thianghlim pek ni se ti-a rel a ni.

Hetihlai hian, PWD puihnaa NHIDCL-in kawng chhe siam hna an thawh mek chuan duhthusam la pha chiah lo mah se, hmasawanna a awm viau tawh nia hriat a nih avangin Nitin mamawh lakluh chungchangah mipui ten harsatna an tawh loh nan - buhfai, eirawngbawlna gas leh tuialhthei phurte chu ngaih pawimawh bik an ni ang tiin nimin khan sorkar thuneitute chuan an rel a,

Nimin khan Commissioner & Secretary Pu H. Lalengmawia leh Supply Dept Secy Pi Teresy Vanlalhruii bakah Mizoram Oil Tankers Drivers' Association

(MOTDA) aiawhte an thukhawm a, Mizoram chak lakluh kawngah ruahmanna hrang hrang an siam a ni.

<><><>

## ASF

Lawngtlai District chu tun dinhmunah Mizorama District zingah Vawk Pulhri (ASF) vanga tuar nasa pahnihna a ni mek a.

Sorkarin a chhinchhiah danin kumin chhungin Lawngtlai District-ah ASF vanga Vawk thi 2151 awm tawhin, heng zinga 1757 chu ASF thihpui niin, Vawk 394 chu Hri an kai vanga tihlum a ni thung. Lawngtlai District a khua/ veng 18 chu ASF lenna niin, chhungkua 380 ASF hian a nghawng buai. Lawngtlai District aiin Siaha District-in ASF hi tuar nasa zawkin vawk thi 4126 a awm tawh.

## VC

*ASF vang hian Lawngtlai ah chuan District Magistrate in khapna thupek a chhuah a, heti chung hian District pawn atangin Vawk lakluh a awm tih LADC Sorkar lam chuan hriain, nimin khan thuchhuah siamin, Ran Doctor ten Vawk hrisel a ni tih an finfiah chauh lo chu zawrchhuah a khap zui ve leh a ni. Tukin khan Lawngtlaia Sa zawrhna hrang hrangte Sanitation & Waste Management Officer Pu C. Lalhmunsiam leh a thawhpuiten fangin, phalna nei lova Vawk talh mi pahnih an man a, dan angin an chungah hremna lek turin an ti.*

<><><>

## OPP REACTION TO ROADS

Hachhek bial chhunga kawngpui chhe lai tlawha kal Hachhek Bialtu MLA Pu Robert Romawia Royte chuan Mizoram leh Tripura inkalpawhna kawng pawimawh Darlak leh Tuidam Road chu chhe zual zel tih sawiin, Sorkarin siamtha tura hma alak tawh loh vang a ni a ti.

Tunhnaia PWD Minister in kawng a siamthat nana cheng nuai 20 chauh a puang erawh chu khawthlang mipuite mak tih a ni a, cheng nuai 500 tal sanction vat turin sorkar a phut tih a sawi. Hachhek MLA chuan he kawng hi Mizoram PWD ta leh enkawl lai anih avangin Mizoram sorkar hian mawhphurhna laa rang taka siamtha turin an phut a ni a ti.

Hachhek bialtu MLA leh MNF Thalai President nibawh chuan Hachhek bial kaltlanga Tripura kalna kawng pawimawh dang Barabi leh Zamuang kawng PMGSY sum hmanga siam mek ah Contractor a thawh muan lutuk avangin PWD in “show cause notice” an pe hial tihsawiin ZPM Sorkar hnuiaia State Monitoring Committee ten Bairabi leh Zamuang kawng siam muan chhan hi vilin zawng chhuak vat se a duh tih a sawi.

Hetihlai hian MNF Party General Secretary Pu J. Malsawmzuala Vanchhawng chuan hriat theih chinah kumin ang em em-a Mizoram chak lakna kawngpui pawimawh a chhiat nasat tum leh heti taka mipuiten an tawrh nasat tum hi Mizoramin a la tawng ngai lo a ti a.

Vawiina Aizawl Press Club-a thuthar thehdarhtute a kawmnaah he thu hi a sawi a, kawngpui siamna tur pawisa awm reng chungah kawng siam that a ni lo chu pawian ti a, Mizoram sorkar in mipui te a zah lo niah an ngaih thu sawiin ZPM sorkarin kawng siam nana chhiah a lak Road Maintenance Cess tlingkhawm pawh

vaibelchhe 25 chuang a tling tawh a ti a. Chhiah petu mipui tan sorkar chu rin zui a harsat a rin thu a sawi bawk.

*(Byte: J. Sawma Vangchhawng)*

Pu J. Malsawmzuala Vanchhawng chuan tuna kawng chhe zual em em, motor tam tak a tan vanga mipuiin harsatna namen lo an tawhna chhan lian ber Kawnpui-New Khamrang kawng chu nikum lamah pawh mipuiten nasa taka an tawrh chhan a lo ni tawh a ti a, kum 2024 September thlaah sorkarin Contractor bantirin, a security pawh cheng nuai 35.37 lai a chhuhsak a, hemi hnu hian engmah ti mumal lovin Sorkar-in a thlir a, a mutthluk san chhunzawm leh avangin kuminah harsatna namen lo tawh a ni ta a ni a ti.

Kumin July ni 7 -a NHIDCL-in an lak fel tak hma zawng kha chuan State sorkar mawhphurhna a ni tih chu thudik a ni a, mawhphurtu dang kawh tur dap phei chu mawhphurhna lak ngam lohna leh a tuartu Zoram mipui zah lohna nasa tak a ni a ti.

MPCC General Secretary Pu PC Lalhlansanga chuan Congress Bhavan, Aizawla Political session ah thusawiin Kawnpui leh Sairang inkar kawng NH-06 chu nikum 2024 fûr-ah pawh khan a chhe em em tawh a, motor tam tak an tlu thin. Mizoram Comercial Vehicle neitute leh Driver ten nawrh an huaihawt a. Kum 2024 september atangin NH 06 km 118 Kawnpui atanga Km 133 New Khamrang inkar chu Mizoram sorkar PWD kutah a awm a. NHIDCL hian Mizoram sawrkar kut atangin kumin July ni 7 atang khan an la chhawng chauh a ni a, thal khaw tha thla 9 chhung PWD kutah a awm a. Chuvangin helai kawng chhiat avanga harsatnatawh mekte hi sorkar mawh liau liau a ni, a ti.

Darлак leh Tuidam inkar kawng siam nan cheng nuaih 20 chauh an dah pawh awmlo a tih thu sawiin Chief Minister motor nuaih 30 man aiin Mamit dist Darлак kawng siamna tur a tlem zawk a ni a ti.

<><><>

## **PROJECT BLOOM**

Aspirational Block Programme leh Project BLOOM (Better Living through Outreach, Optimal Maternal & Child Health) kal tlanga Lungsen Aspirational Block huam chhungah damdawiina nau nei nasa takin an pung a, a tum khat nan kumin June–July chhungin zaa 70 a kai.

Lungsen RD Block chhunga damdawi ina nau neih zat chu March 2023-a zaa 14.73 atangin Aspirational Block Programme hnuai hma lakna kal tlangin March 2025-ah zaa 43.1%-ah a kai chho va. June 2025-a Project BLOOM kalpui hnuah hmasawna nasa zawk hmuh belh niin, June–July 2025-ah chuan zaa 72.2-ah a kai chho tawh.

*VC*

*Lunglei District Lungsen RD Block chhunga hmasawna hi Project BLOOM hnuai nu nau paiin damdawi in ngeiah nau a neih theih nana inzirtirna te, a thlawna koh mai theih tur lirthei – Safe Womb Wheel' ruahman te, nau nei tur leh buaipuitute lo chawlh lailawkna khualbuk ruahman te, raipuar an nau pai atanga*

*thla thum chhunga inziak lut (register)-te hnena 'BLOOM Gift Basket' pek te leh hma lakna dang dang rah chhuah a ni.*

Hei bakah hian, Raipuarate'n enkawlina leh chaw tha a hun taka an dawn theih nana nau pai atanga thla thum chhunga inziak luh chungchangah pawh hmasawna hmuh niin, nau pai tirh thla thum chhunga inziak lut March 2023-ah zaa 50.6 an awm laiin, June–July 2025-ah chuan zaa 65.38-ah a pung chho tawh a ni.

<><><>

## **MUHCS**

Kolkata khawpuia Damdawi In pakhat Peerless Hospital chuan Mizoram Universal Health Care Scheme (MUHCS) an zawm a, Mizoram sorkar an ringgam bakah Mizo mipuiten an hlawkpui ngei an beisei tih an sawi.

Peerless Hospital thuneitute chuan vawiin khan Aizawl Press Club-ah Chanchinbu mite an kawm a, Peerless Hospital Senior Consultant Dr. Ashok Bandyopadhyaya chuan, Mizoram atangin damlo tam takin an Damdawi In an pan thin thu leh Mizoram Universal Health Care Scheme (MUHCS) an chhawr thei tih a sawi bawk.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## **PM MODI**

Prime Minister Narendra Modia chuan vawiin khan Maldives Independence Day vawi 60-naah khuallian niin a hmanpui. Puan tawh angin PM Modia hian Maldives President Dr.Mohamed Muizzu sawmna chhangin Maldives hi a tlawh a ni.

Vawiin vek khan PM Modia hian Maldives Vice President Hussain Mohamed Latheef nen an inkawm bawk a. Hruaitu pahnihte hian India leh Maldives inthianthat dan te sawidunin hmasawna ruhrel, technology, sik leh sa inthlak, energy leh thil pawimawh dangte an sawidun a ni. Pu Modia chuan ram pahnih thawhdunna chuan mipuite tan hlawkna tam tak a thlen thu sawiin hun lo kal turah pawh an inlaichinna tih that zel a duh thu a sawi a ni.

<><><>

## **KARGIL DIWAS**

Vawiin khan kum 1999 Kargil indonaa sipai thite hriatrengna Kargil Vijay Diwas hman a ni a. President Droupadi Murmu-i chuan Kargil indonaa sipai thite zahna a hlan. President Murmu-i chuan

sipaite huaisenna, inpekna leh inhlannate vawiin Kargil Diwas hian a hriat thar tir tih a sawi a. Ram tana an inpumpekna chuan ramchhung mipuite thinlung a hneh em em a ni a ti.

Defence Minister Rajnath Singh pawhin vawiin khan New Delhi-a War Memorial ah sipaite pualin pangpar a dah a. He hunah hian efence Secretary Rajesh Kumar Singh, Chief of Defence Staff General Anil Chauhan, Chief of Air Staff Air Chief Marshal AP Singh, leh Chief of Naval Staff Admiral Dinesh K Tripathi te pawhin pangpar an dah bawk a ni.

<><><>

## **KARGIL VIJAY DIWAS**

BJP Mizoram chuan vawiin khan "Kargil Vijay Diwas" pualin BJP Mizoram State Office, Mipui Rûn-ah hun an hmang.

Palak Bialtu MLA Pu K. Hrahmo chuan, vawiin hi India ram tana ni pawimawh leh ni chhinchhiah tlak tak a ni a ti a, Kum 1999-a Kargil War-a India-in hnehna a chan hriatrengna leh chu Indona-a Sipai huaisen nunna chan ta te hriatreng nana hun hman thin a ni, a ti.

Pu Hrahmo chuan hmanni lawkah Operation Sindoor atang pawh khan Pakistan tan chuan India beih hi a sim thlak hle ngeiin a rinawm a ti a, Mizoram mipuite pawh India rama an awm chu an vannei hle tih sawiin, lawmna chang hriat pawh a ngai a ni a ti a. India ram hausakna chhawr ve turin Mizoram mipuite pawh an inbuatsaih a, an ngaihtuahna an sen a ngai a ni," a ti bawk.

Inkhawmna hun neih zawhah hian, Sipai huaisen Ram tana nun chante hriatrengna leh zahna en tir nan War Memorial, Zodin Square ah MLA leh State Vice President Pu Vanupa Zathang te'n pangpar an dah bawk a ni.

<><><>

## **PM MANN KI BAAT**

Prime Minister Narendra Modi chuan naktuk Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 123-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>